

## Spich Dodenherdenking Minpres 4 mei 2024

Kerido invitadonan i komunidad di Kòrsou, felis mainta,  
Tur aña di nobo riba 4 di mei nos ta bini huntu, aki na e “Monumento di víktimanan di e di dos Guera Mundial”, pa konmemorá e personanan ku a pèrdè nan bida na momentu ku nan tabata defendé atentadonan riba libertat humano durante e delaster guera mundial.  
Nos lo keda bini huntu pa konmemorá e héroenan aki tur aña di nobo.

E tema di e aña aki ta: Libertat.

Libertat ta e kapasidat òf derechi di e ser humano pa aktua conforme su norma i balornan, boluntat i deseo, semper teniendo kuenta ku limitashonnan reglá den leinan di un sosiedat, manera siguridat di pais i órden públiko, tratadonan internashonal, por ehèmpel tokante diskriminashon entre rasanan, i respetando norma i balornan di otronan den e sosiedat.

Libertat ta krea un sentido di responsabilidat individual i sosial, dirigí riba un desaroyo sano den kombibensia sosial.

Den e kuadro aki, den un pais demokrátiko libertat por tuma diferente forma, manera: libertat di ekspreshon, libertat di prensa, libertat di religion, libertat pa manifestá i libertat di eskoho.

Pues, e derechi di libertat individual ta esensial pa un desaroyo sano di un komunidad demokrátiko.

Apesar di esaki no opstante esei, diferente faktornan por limitá nos libertat, manera norma i balornan, kustumbenan den un kultura, leinan lokal i tratadonan internashonal.

Teniendo kuenta ku tur e faktornan aki e ta di sumo importansia pa ora nos ke apliká libertat nos tene kuenta ku e libertat di otronan tambe.

Por ehèmpel, ora ta trata libertat di ekspreshon di opinion personal, kada unu di nos tin e deber di tene kuenta kon nos ta ekspresá nos mes pa evitá di ofendé otronan sin tin mester.

Esaki ta konta tambe pa tur e formanan di libertat ya menshoná.

Libertat ta bini ku kondishonnan mará na dje, pa asina trese un balansa entre interesnan di kada siudadano, kompará ku e interesnan di otro siudadanonan na un banda, i di otro banda e interesnan di un siudadano kompará ku e interesnan kolektivo di hinter un sosiedat.

Sin e balansa aki, nos lo ofendé otronan innesesariamente òf hasi nan daño sin tin mester.

Asina nos lo yena nos kortenan ku yen di disputanan innesesario i mantené instabilidat struktural den nos sosiedat.

Un ke otro ta afirmá ku e libertat personal di un hende den prinsipio no por keda limitá sin mas, por ehèmpel pa motibu polítiko òf posishon sosial.

Esaki tabata klaramente e kaso den di dos Guera Mundial, kaminda e libertatnan di un grupo grandi di hende na Europa a ser interumpí pa motibunanan polítiko, lokual tabata inaseptabel i hasta kondenabel.

Un pais kaminda kada siudadano ta konsiente di e nifikashon real i balor di demokrasia, ta un pais ku ta konsistí di siudadanonan ku semper ta respetá, tolerá, komprondé, rekonosé i kombibí ku otro.

Lokual ta esensial ta pa nos tin un demokrasia ku ta funshoná bon.

Un demokrasia ku ta basá riba norma i balornan ku hinter komunidad ta kompartí, manteniendo un estado di derechi akseptabel, inkluso e derechi riba libertatnan esensial.

Bisando esaki laga nos kada un konsiderá pa ora nos ta gosando di nos libertat nos tene konsiderashon, komprension, apliká toleransia i rèspèt pa ku otronan, pa asina ei promové un kombibensia sano, duradero i union den nos pais.

Esaki ta sumamente nesesario den un pais manera Kòrsou, kaminda tin diferente nashonalidat i kulturanan ku tin ku biba den pas, harmonia i solidaridat ku otro.

Laga kada unu di nos asumí e responsabilidat pa defendé e libertatnan esensial di kada siudadano, na interes di un desaroyo sano di nos demokrasia i nos komunidad.

Kerido siudadano, rekordando awe ku durante e último Guera Mundial hopi a duna nan bida pa e libertatnan ku nos ta gosando di dje awe, laga nos sigui defendé i promové nos libertatnan esensial den tur skina di Pais Kòrsou.

Maestro di Seremonia,